

題辭

淋漓元氣充塞高厚人隨化運孰能
窺牖有大力者負之而走陶冶在心
端倪在手或一卷書或一杯酒興來
莫遏揮斥萬有強作品題杜師韓友
質之

先生曰然否否

館侍長洲顧莼

不易居齋集敘

予自乾隆壬子領解北上守禮部試四次週七霜乃歸出都門時則己未之十月

矣其前三年蓋依南海陳榕溪師名鶴翔三河縣齋讀書爲多其後三年則栖止鑲黃

旗覺羅官學教習舍中坐客無氈種花度日實惟此時而中宵抱疚八十老親尙操硯田以活不肖之妻若子仰天刺心不可告人每一擲管愁苦森發愛我者見輒戒之而不能知予心之所自來也不易居齋隨身自額尙非心語況其詩乎然而則爲不易居齋之詩矣年來血泣轉眼星移

恩重詞垣行將有日檢理殘篋片紙零星則皆丙辰以後之作聚而復汰僅若干首都爲一集夫鄉里父老艱苦半生逮有子孫提攜曝背縷縷前時負販事移晷未休豈自鳴意得哉心良苦耳則我是集何肯棄耶何肯棄耶

嘉慶七年壬戌冬月宋湘自敘

不易居齋集 起丙辰至戊午

嘉應 宋湘 芷灣

古近體詩七十一首

雜詩四首

汲井下銀瓶起瓶月上手瀉水入銀杯舉杯月亦有納之心與腸足可轉八九八九
轉無端捫之清且寒誰謂心腸中不能如井寬
終日營華服服成人已老終日營大田田多生細草何爲世間人力與天爭巧長安
塵滿城炎天日杲杲何不典清酒莫自使枯槁
閱世四十年忽忽歎無成人苦不自知百感戕其生陶潛猶乞食杜甫尙依人吟詩
豈在好得酒還獨傾公卿聞羨人我何羨公卿
東風吹綠來好鳥鳴窓樹往復不愆期朝朝復暮暮樹下讀書人今讀到何處書亦
不盡讀讀者何所悟枝葉脫節根豈伊古人誤

接家信

日有平安報中宵淚亦多經年曾不至一紙定如何爲子可堪此持緘重自訛那禁
先手戰 老父字成蜩

種花二首

北院槐樹陰日光午未杲南院陰不到杲達昏曉同時所種花南黃北青了青者
豈不喜陰多露亦少黃者豈不憐脉鍊氣深老不信待他日花開看誰好人生立功
名豈在遲與早

種木計十年種花計一歲取適耳目目前亦貴使其繼朝來買花苗紅紫襍瑣細僮僕
爭執之頃刻一庭砌詰旦掇新華良亦盛佳麗顧予獨永懷秋風會時至何不多種
菊以爲晚節計

瓜蔓三尺長荳蔓三尺短綠葉何盤盤一一穿籬眼籬眼縱且橫中間花爲城行列
旣布置深淺亦調停時時察虫蟻保護根與莖灌溉苟不惰理可回乾坤

夜雨

連日天氣蒸春光快花剪樓閣生暮陰頓失棉衣暖幽人觀化心事事不得懶一更
紙窓鳴二更聲忽斷三更啓戶出掌濕不可卷始知春雨細一使春風軟簷響始不

聞樹滴漸可辨水虫澁新吟爐煙迴虛轉不覺倍懷人殘燈伴孤館

孤鵲詩 并序

寓槐當戶一株日嚮夕輒有一鵲拳其上衆鳥尙啁啾作忙此鵲氣殊冷而意甚靜亦莫識其爲雄雌孤鵲可知也作孤鵲詩

無侶復無巢日夕旅卽次一枝豈有擇雙栖若無意爾鵲何爲者得非抱貞義方春二三月羣飛競相媚樂生物之情志勤物之事而鵲處其間不聞亦不避莫或余敢侮侮者自不至有時風動枝略效雨縮翅晴乾聽天時歡喜付人世此豈果鵲情無由道鵲志熒熒檐際星照影不到地明當復歸來獨客戶且閉

讀杜工部集四首

此老愁心極千秋一擅場不成爲稷卨終得掩曹揚

公詩賦料揚雄敵詩看子建親

流落才招取

遭逢事感傷安排詩作史有意果蒼蒼

獻賦初心在參謀百計違艱難畱草履涕淚說戎衣諫草無人見朝班有夢歸十年秦蜀路又逐楚雲飛

滿目雖多事扁舟亦可憐逢人皆乞食訪道不成仙兀傲開元老崢嶸大歷年落花
漫新句風雨暮江前

自許詩堪老原知死更傳山川書劍過歌哭日星懸髮豈風塵白心猶道路憐千秋
江漢月寂寞亦娟娟

小圃四絕句

槐樹兩年無此榮抽枝接葉花細生落英纔掃又滿地圍屋山蜂爭曉晴
客中寸土不易得屋角牆根皆蒔花連日雨多藤蔓死籬頭再補及秋瓜
名花天下口如一草花一處一名殊愛汝顏色得妍好南人也學北人呼
園中衆花以色勝一二色少以香多夜深獨起坐風露時有清聲聞落柯

適讀杜少陵寄五弟豐詩見其與四亡弟同名掩 卷感絕

生離猶惻惻死別况茫茫破篋文長闕殘封蠹已僵多年偷墮淚有父在高堂不
見墳頭草而今又六霜

脚病

瘦馬傷蹄日英雄撫髀時
避人扶小豎削杖廢長筌
筋骨千錘折乾坤一繫維
平生浪蓬轉今日守株爲

寄鄭三丙昌

挂帆向風浪進退交怍怍
終日坐車壁轟轟如耳鳴
心口自相語八九不得呈
浪定馬解鞍一夢來生平
欠伸復大噫稍自聞其聲
我與曉園子文字爲友生
久乃見肝膽終而成弟兄
己酉與庚戌兩載同昏晨
山下叢書閣風雨嘈嘈聽
登堂拜壽母啼笑襍孩嬰
依依眞家人不聞雞犬驚
衣食共枰槩僮僕無鬪爭
我出車子車我入燈子燈
並影檢文史交綦傾栝觥
有時並馬出賞花兼聽鶯
鶯花亦有意呢子還我親
我貧累八口子富非千塍
每當家書來輒亦指一園
我才愧比管君義高同陳
人生非木石安得無性情
爾後或小別逐逐肥馬塵
數月得相見夜語恆無眠
相期共跋浪大海飛鯤鯨
壬年七八月夜夜秋風清
爲我僦夏屋踏月五羊城
豈意梁上材不及鑿下薪
敢喜珠出海翻憾玉遺荆
子乃殊欣然盛餞江之濱
長途沮行色一一勞

經營轍跡一以北百疊書殷勤濶懷有歲月篤契無關津區區兩蝸角望我如望君
如此五六年鬱鬱俱未伸顧我鬚裏戟知子眉含顰我今尙畱滯非官縻 帑銀教習

給月錢二
千米二石

騎驢北門出風雪滿其身希冀捧一檄爲養非爲名筆硯焚且盡酒債

時交征此心如稿木宇內惟寓形樓中紅杏花或畱與子孫初秋有人來自言君比
隣聞子頗欲出行行搖雙旌掃榻踰三月倒屣虛一迎想又不復來或待明年春如
子二頃田進止俱可憑前書略已及不復唇舌申憶子送我時索詩何丁寧數載不
一報繫豈忘故人亦欲得佳境稍與句俱新豈謂氣蔬筍擺脫全無因積憫那可道
着手難爲停喁喁兒女語拉雜交甘辛寂寞首重回覩縷情乃眞八千里頓首珍重
雙紅鱗

看瓜

去年瓜大今年小今年瓜遲去年早去年瓜好雨亦好今年雨滯瓜苗天拖泥帶水
補種瓜秋來的的瓜初花風露清微日光爽蜂腰鶯脰交籬笆先生顧之色亦喜晚
食得少味應美但莫秋雨復秋田打落瓜花兼瓜子城外園丁一萬家可曾翻覆泥

瓜車

山齋秋夜四首

樹雨殘畱滴林風遠遞生無霜燈壁冷有字草蟲清頓挫名心死崢嶸病骨鳴難孤
山外月慳躔繞階行

時方脚疾

乍見山河影西窓一抹痕漸多微礙樹又上欲當門孤客荒吟思沈痾負酒樽掩關
愁索臥牢落夢中論

不寢非關冷何悲亦爲秋井欄鳴鬪葉簾角入牽牛書劍憐生計江湖感昔游披衣
行更坐風露一螢流

纂纂將英菊離離就熟葵葉明團露細香暗著風遲客味閒難得秋心靜易知呼童
看北斗城柝夜何其

淳道示僕

我還塵滿面爾敢足爭人努力泥塗走回頭虎豹瞋目原無富貴心莫枉酸辛歸去
衣聊澣先酬五字新

健馬篇

健馬可用而不可用老馬不可用而可用君不見健馬一日可萬里騰風掣電血微
泄失脚已困溝中水健馬不可用而可用老馬可用而不可用君不見老馬百戰膽
不寒出生入死天地寬血肉臭腐皮骨乾馬兮馬兮予心酸

八月十五日得四川官軍掃蕩安樂坪賊匪捷報

二首

談兵不到草萊臣聞喜猶能作頌聲三載

聖人勞旰食萬方赤子請長纓原知此輩魚游釜頗費將軍竈減營拉朽摧枯好乘
勝河清還我舊昇平

上皇萬壽

聖皇朝一片紅旗到九霄自是

天庥應如響誰逃

國法妄興妖勢成破竹師無敵幕有巢烏將勿驕卽待春農歸洗甲便趨 春殿共

聞韶

肺病

骨髮秋風入山猿咳嗽如聒鄰疑老大廢業負居諸高枕年無賴垂頭月有餘可憐
成底事四十此寒樗

煮瓜三首

廚舍偏側來瓜香童子咂咂圍爐旁入秋幾日瓜可食却憶春初分瓜秧先生種瓜
如種玉日日澆瓜澆不足釜中霍霍亦可憐飢來且果先生腹
擔頭賣瓜滿街走園中摘瓜我自有耆秦人炙耆吾炙味亦相同趣則否先生不是
東陵侯漢陰之叟難可儔祇欲自號老農圃婦子遠隔生人愁
伐檀伐檀河之干園有瓜分長且團於國於家一無補安得假借非素餐先生潦
倒牛馬走萬事蹉跎可回首再欲作歌聲已酸不如有瓜且賒酒

乾隆癸丑中秋

陳榕溪夫子自三河遣人走京

師招

湘讀書官舍且命卽日束裝趁節賞月蓋下

車之第七日也距今夕乃五年矣 夫子俸滿不
遷湘復畱滯都門偃蹇如故極思來會此節一話
萬端以病新起不果對月孤吟惆悵無極時嘉慶
三年戊午八月十五夜

憶客三河縣今宵忽五年感時瓜已熟紀事月頻圓後會知何地相違況眼前平生
一師弟欲語轉茫然

宦轍還如此羈踪那復論馮唐垂白首芳草漫王孫一病連三月孤斟冗半樽遙知
對良夜感舊亦聲吞

秋陰三絕句

秋陰如夢不思醒暮雨朝風亦自停園裏菊英三百本爭人瘦影入虛櫺
不關多病故人疎晝掩柴門百慮除削竹補籬深護菊移香就枕細攤書

通家子弟陳香浦百里能分小摘梨是日自三河走使棖觸舊游秋又老盤山紅

葉寺東西

人皆議少陵絕句爲短予以少陵自不肯爲人之
所長若夫古今派別焉可誣也杜自云法自儒家
有心從弱歲疲或輒以別調目之是可異已作二
絕句

豈果開元天寶間文章司命付梨園諸公自有旗亭見不愛田家老瓦盆
滿眼餘波爲綺麗少陵家法必風騷千秋尙有昌黎老流出崑崙第二條

小籬二首

驟夕我愁雨沉陰天不開小籬成獨坐冷客或能來愛菊頻探蕊傾家一舉枯飢鳥
誰飯爾落葉走枯苔

客久鄰兒狎招羣過短墻但無驚蜀犬亦愛舞商羊病脚關門懶秋聲滿屋涼明年

迴首地吹壁記行藏

教習將
報滿

題畫美人睡起三首

看看一意慵宵中疑被酒下床不喚人釵子枕前後
簾鉤簌簌鳴衣帶纖纖弄想是尋不來分明有殘夢
開落瓶上花消息爐中火猶憐初睡時添香理花朵

重陽前一日

菊花時節瀟瀟雨六枳籬邊浥浥香不剪藤蘿風自落將收菜甲日添黃客當無事
苔堦淨奴有童心藥鼎涼病骨近來唯一懶游人何處又重陽

支離四首

著書無筆力飲酒亦支離眼底傳人少身前造物疑閒花開自落小圃我同誰又是
年垂晚秋光到九時

愛菊嫌籬破編籬護菊來前年新種樹一半老成材何處海潮沙有車雷往迴閉門
甘寂寞懷古一登臺

久客名何在奇窮骨奈驕百思惟睡好一枕得春饒惜字畱殘刺傾家贖敝貂天寒
日更短庭樹亦蕭蕭

落日啣林半歸禽各對呼兩三巡竈犬五六候門奴自笑客何者能如耕也無南山
田二頃四壁滿瓜壺

聞雁

只道霜應落寧知雁已飛寒空千響咽獨夜一燈微到我門前水逢人月下機莫因
無字去須得有書歸

重聞

後雁續前雁前鳴催後鳴追飛應不遠急響若爲情月塞千山迴霜天一夜明如何
北遊者不解向南征

又聞

每到人聲定長空又雁聲一年秋幾夜萬里月孤明作客原無賴浮生復爾情獨憐
來去易偏挾羽毛輕

十月十五日夜雪一首

簷日晚尙明野煙昏已滿禁城柝遞深人海聲遙緩大噫一以息寒鄰百相欺昏

燈照敝裘滯客嬰荒館移几俯熾爐取泉注深盃疎櫺瑩新明虛幌薄餘煖倒影浮樓臺流光接町疇呀呀驢何鳴淅淅葉微伴檢時正小雪紀日當中澣兆豐期匪愆集霰晷叶短以茲陰陽調則喜灾沴罕前者莫一葉窺天手寸管曰朔鳥則虧曰望兔斯斷而皆濃陰護章亥不足算

舜心自有雲宣時漫多旱穆穆

兩聖人旰食不忘遠合信
德回天況談山壓卵洗兵豈無日挽河卽堪盟紛紛楚蜀隅踈踈麋鹿轉此皆太平民輕棄百家鄲文德以遠懷武功亦載續殲渠咸維新誕告在用亶春牛郭北眠思婦城南懶諸將夫何人庖丁識大篆此夜倘入蔡作碑韓誰祖

曉起對雪二首

紙窓風斷炭鑪灰城角鐘聲一片來不道人家煙漠漠已看天井雪皚皚真堪濯魄團將嚙莫便呼僮掃作堆閒與隣翁數年景好花飛到第三回到眼清華也不貧十分冷淡足精神羌無明月來涵影略有迴風去逗春童子乞隣知請火先生擁絮肯干人多情頗愧庭前鶴一步移將一步親

身在樓臺縹緲間，清光如此不塵寰。
縱嫌衣薄應須耐，便壓簷低那許刪。
畫裏孤舟人釣水，夢中一樹我游山。
安排驢子橋頭去，消受先生此日間。

與人論東坡詩二首

縱不前賢畏後生，名山勝水本無形。
唐翻晋案顏家帖，幾首唐詩守六經。
一生心醉陶彭澤，暗地師資杜少陵。
畢竟要還真面目，人豪纔是戒來僧。

雪霽即句

夜半嘈嘈風四鳴，曉寒殊重夜寒輕。
何人看雪句先得到，我開門天始晴。
山影壓城無遠近，月光照海此分明。
閒居自喜稀來往，小掃槐根買酒行。

孤燈效玉川子五首

無言無笑非無燈，破寺龕前可見曾。
又是黃昏供一椀，我真成佛僕成僧。
不帷不檠案無鼠，乍北乍南窓有風。
忽聽隣鷄聲似海，始知身是住城中。
三尺塵埃壁上劍，數本散亂牀頭書。
劍光耿耿雪抱匣，書聲呶呶霜壓廬。
數莖黃鬚兀自撚，每到三更三點時。
童子不知聊破寂，背言窮死只吟詩。